



Облыстық қоғамдық-саяси газет

МАҢҒЫСТАУ

1973 жылдың 13 сәуірінен шыға бастады



mangystaumedial.kz

АУА РАЙЫ

	ТҮН	КҮН
Ақтау	+12	+15
Жаңаөзен	+10	+13
Форт-Шевченко	+11	+14

№105 (10181) 25 қазан, сейсенбі, 2022 жыл

25 қазан
РЕСПУБЛИКА
КҮНІ



Құрметті маңғыстаулықтар!

Баршаңызды айтулы мереке – Республика күнімен шын жүректен құттықтаймын. Мемлекет басшысы Қасым-Жомарт Тоқаевтың бастамасымен бұл күн ұлттық мерекелер тізбесіне еніп, азаттық пен бостандықтың сәнбес алауындай, еліміздің мәңгілікке жол тартар көгілдір жалауындай тарих беттеріне алтын әріптермен жазылады.

1990 жылы 25 қазанда Қазақстанның егемендігі туралы декларация қабылданып, Қазақ Кеңестік Социалистік Республикасының егемендігі, тәуелсіз мемлекет ретіндегі саяси-құқықтық негіздері жарияланды. Бұл атаулы күн – ата-бабаларымыздың ғасырлар бойы аңсаған асыл арманы, осы жолдағы жанқиярлық күресінің ақиқатқа айналған күні.

Ұлытауда өткен Ұлттық құрылтайда Мемлекет басшысы Қасым-Жомарт Тоқаев Республика күнін қайта жаңғыртып, ұлттық дәрежеге көтерудің маңызын ерекше атап өткен еді. Бұл өткен тарихымызды жаңғырта отырып, жасампаздыққа, елдің бірлігі мен әлеуметтік-рухани өрлеуіне жол ашатын айрықша сипаттағы мереке болмақ.

Бұл айтулы күн – көпұлтты Қазақстан Республикасы халықтарының бірлігі, татулығы мен келісімінің символы. Осы орайда еліміздің әл-ауқаты күн сайын артып, әр шаңырақта бейбітшілік пен бақыт салтанат құрсын дегім келеді. Мереке күні баршаңыздың отбасыларыңызға амандық-саулық, құт-береке тілеймін. Тәуелсіз Қазақстанның өркендеу жолында жасап жатқан игілікті істеріңіз жемісті болсын. Ертеңгі күнге сеніммен қарап, бейбіт өмірде бақуатты ғұмыр кешіп, ырыс-несібе мен құт-берекеміз молая берсін!

Құрметпен, Маңғыстау облысының әкімі
Нұрлан НОҒАЕВ



Президент Республика күніне орай мемлекеттік наградалар мен сыйлықтар тапсырды

АСТАНА. Республика күніне орай мемлекеттік наградалар мен сыйлықтар тапсыруға арналған салтанатты рәсімде ҚР Президенті Қасым-Жомарт Тоқаев Республика күнімен құттықтады, деп хабарлайды ҚазАқпарат.

Баршаңызды еліміздегі ең ұлық мереке – Республика күнімен құттықтаймын! Бұл – қазақтың сан ғасырлық мемлекеттілік дәстүрі жаңғырған күн. Бұл – бостандық үшін күрескен бабалар арманы ақиқатқа айналған күн. 1990 жылы 25 қазанда Қазақстанның егемендігі туралы декларация қабылданды. Бұл құжат тәуелсіздігіміздің саяси-құқықтық негізін қалыптастырды. Бір сөзбен айтсақ, декларация – еліміздің тәуелсіздік алуына жол ашқан ақжолтай құжат, – деді ҚР Президенті Республика күніне орай мемлекеттік наградалар мен сыйлықтар тапсыруға арналған салтанатты рәсім кезінде.

– Мен Ұлытауда өткен алқалы жиында Республика күніне ұлттық мереке мәртебесін қайтаруды ұсындым. Оны Қазақстанның басты мейрамы ретінде атап өту туралы бастама көтердім. Бұл бастама халықтың кең қолдауына ие болып, тиісті заңға өзгеріс енгізілді. Биылдан бастап Республика күні – ұлттық мереке. Енді бұл мейрамды күллі ел болып жаңа мазмұнда атап өтетін боламыз. Қайта жаңғырған Республика күні – бұл халқымыздың рухын көтеріп, елдігімізді нығайта түсетін аса маңызды тарихи қадам. Сондықтан осы мерейлі күн азаматтарымыздың өзара түсіністігін, тұтас ұлтымыздың еркін өмірге және дербес дамуға ұмтылысын паш ететін мереке болмақ, – деді ҚР Президенті.

Сонымен қатар Мемлекет басшысы Егемендік декларациясына тоқталды. – Егемендік декларациясын халықтың жан-жақты және ұзақ жылғы күресінің нәтижесі деуге болады. Әрине, мұндай қадамға бару оңай болған жоқ. Еліміздің сол кездегі саяси-әлеуметтік және демографиялық ахуалы тұрғысынан қарасақ, бұл өте батыл әрекет болатын. Егемендік декларациясы – тәуекел мен дипломатияның, ақыл мен сабырдың жемісі. Осы тарихи құжаттың әсері көп ұзамай байқала бастады. Біз қоғамның іргетасын жаңартып, жаңа белестерге ұмтылды. Қазақстан қиын өткелден өтіп, іргелі ел болуға бағыт ұстады, – деді Мемлекет басшысы.

Бізге азаматтарымыздың сұранысына сай келетін идеология қажет екенін, егемен ел болу оңай емес, бірақ елдікті сақтап қалу одан да қиын екенін айтқан Президент қастерлі тәуелсіздігіміздің тұғырын нығайта түсуге тиіс екенімізді атап өтті. Одан әрі даму үшін жаңа стратегиялық бағдарымызды айқындаудың маңыздылығына тоқталып, соңғы жылдары түрлі салада түбегейлі реформалар қолға алынғанын, мақсатымыз – әділетті Қазақстанды құру екеніне және біздің осы күрделі жолдың басында тұрғанымызға назар аударды.

– Қазақстан халқын ұйыстыратын тағы бір символ – мемлекеттік тіл. Қазақ тілі мәңгілік мемлекеттік тіл тұғырында болады. Қазақ тілінің қолданыс аясын арттыра беру – мемлекеттің міндеті. Бұл жұмыс тоқтамайды, жалғаса береді, – деді ҚР Президенті.

Сондай-ақ Қ.Тоқаев еліміздің барша азаматтарын біріктіріп, ортақ іске жұмылдыратын тағы бір символ – Мемлекеттік ту екенін айрықша атап өтті.

Мерекелік рәсім соңында ел Президенті мемлекеттік наградалар мен сыйлықтар тапсырды.

Бауырлас елмен байыпты байланыс

Жуырда Ш.Есенов атындағы Каспий технологиялар және инжиниринг университетінде ҚР Ақтау қаласындағы Әзірбайжан Республикасы Бас консулдығының басшысы Эльмар Маммадовтың «Басты және ұлттық мереке – Қазақстан Республикасы күні» және «Әзірбайжан Республикасының мемлекеттік тәуелсіздігін қалпына келтіру күні» атты атаулы мерекеге арналған дәрісі өтті.

Университет президенті Берік Ахметов жиынды ашып, осынау қос мерекенің мән-маңызы жайында айтты.

– Бүгін іс-шара екі маңызды оқиғаға – «Қазақстан Республикасының Республика күні» мен «Әзірбайжан Республикасының тәуелсіздігін қалпына келтіру күніне» арналады. 1990 жылғы 25 қазанда Қазақ Кеңестік Социалистік Республикасының егемендігі, яғни республикамыздың дербестігі туралы құжат қабылданды. 1991 жылғы 10 желтоқсаннан бастап Қазақ Кеңестік Социалистік Республикасы Қазақстан Республикасы деп атала бастады. Біздің республика жеке тәуелсіз елге айналды, бұл күні біздің мемлекетіміз өз Елтаңбасын, Туын, Әнұранын алды. Өз кезегінде 1991 жылы 18 қазанда Әзірбайжан жоғарғы кеңесі Әзірбайжанның тәуелсіздігін жариялау туралы конституциялық актіні қабылдады. Осы сәттен бастап Әзірбайжан Республикасы мемлекеттік тәуелсіздікке ие болды, ал 18 қазан ұлттық тәуелсіздік мерекесі болды. Қазақстан Республикасы күні қарсаңында стратегиялық әріптес және одақтас елде аталып өтілетін осы айтулы уақытта бауырлас Әзірбайжан халқына шын жүректен құттықтаулар мен ізгі тілектерді жеткізу мен үшін зор қуаныш. Yessenov University Каспий теңізінің жағасында орналасқан ең ірі заманауи университет ретінде Әзірбайжанның жоғары оқу орындарымен белсенді ынтымақтастық орнатып отыр, бүгінгі таңда университетте ынтымақтастық туралы 10-нан астам меморандум бар.

Жайық НАҒЫМАШ

2-
БЕТ